

# 1 TESALONICENSES

## *Pablowã queédih ã túyat tútat*

<sup>1</sup> Weém Pablo, yeéb Tesalónica tútchidih moón jwĩ íp Dioíhwã, jwĩ Maáh Jesucristoíhwãbut ñi jumuchah, nin núodih biíhdih daacát túttnit, yeebdíh wã wahna caá. Weém, Silvano, Timoteojĩh, jwiit biíc peihcannit yeebdíh búdí jwĩ túyat túttna caá. Jwĩ íp Dios yeebdíh oinit, ã teo wáaca naáh, ñi túi jumát pínah niijná.\*

## *Tesalónicadih moón ã tút nuumát*

<sup>2</sup> Diosdih uúbhna, “Míih Tesalónicadih moón ã tút nuumátji ã túina caá, Paá”, jwĩpĩ niijná caá. <sup>3</sup> Yeebdíh náhninit, Diosdih nin pah jwĩ niij uúbhna caá: “Paá, míih Tesalónicadih moón meemdíh túi jenah joinít, ma weñat pínahdih ípĩ chãjna caá. Meemdíh oinit, bitadihbut oina, queédih ípĩ túi teo wáacna caá. Jesucristo ã jwúub dei júuwát pínahdih túi wēi pãinit, meemdíh ã cádahcan caá”, jwĩ niijná caá. Páant ñi jumát dih búdí wēinit, Diosdih “Túina caá, Paá”, jwĩpĩ niijná caá. <sup>4-5</sup> Jwĩ déewã panihnitá, Jesucristoíh túini doonádih yeebdíh naóhna, oboh jumni naáwát nihcan jĩ. Obohjeéhtih, Túini Espíritu ã wēpatjĩh yeebdíh jwĩ naáwáp jĩ. Páant jwĩ naáwáchah, Túini Espíritu yeebdíh ã teo wáacap jĩ, jwĩ naáwát dih joinít, ñi jepahat pínah niijná. Páant ñi jepahachah, Dios yeebdíh oinit, áihwã pínah ã ñíwatdih jwĩ jéihna caá. Ñijeéh jumnit, yeebdíh jwĩ túi teo wáacatjidih yeebbút ñi jéihna caá.

\* **1:1** Hch 17.1

<sup>6</sup> Ñijeéh jumna, ded pah jwĩ chãjatjidih ennit, jwĩ Maáh Jesucristo ded pah ã jumatji doonádihbut jéihnit, yeebbát biíc yoobó ñi chãjna caá. Jesúih túini doonádih joíhcan íjna, bita yeebdíh yeejép ã chãjachah yuhna, Túini Espíritu yeebdíh ã teo wáacachah, yeéboó wěinit, Diosdih ñi túi joyóp jĩ.\* <sup>7</sup> Páant ñi jummat doonádih joinít, nihat ñíih baác Macedonia baác dih moón, nin baác Acaya baác dih moón Jesúihwã ñi jummat pah muntih túut nuumná caá ã chãjap. <sup>8</sup> Pánihna, jwĩ Maáh Jesúih doonádih jepahnit, ñi túi túut nuumátji doonádih joinít, bitabut jwĩ Maáhdih ãt jepahap wut jĩ. Ñíih baác dih moón, Acaya baác dih moonjéhbüt nihcan, nihat baác dih moón Diosdih ñi túi jepahat doonádih ãt joyóp wut jĩ. Ñi wüt yána caá. Jwiítboó ñíih doonádih queéd dih jwĩ naóh jwuhcah, queét jãtíh ãtát joyóp tabe. <sup>9</sup> Pánihna, ñi túut nuumát doonádih jwĩ naawát déedih, yeéb jwiít dih wěi jwãáhnit, ñi túi joyátjidih ãpĩ jwãáh naawáp jĩ. Ñi pãpninadih wúbh cádahnit, Dios yoobát dihjeh wěi wúbh nit, ã watat dih ñi túi jepahatjidihbut ãpĩ naawáp jĩ. <sup>10</sup> Dios wãúh jeámant ã jwúub dei jãúwát pínah dih ñi túi páñat dihbut ãpĩ naawáp jĩ. Caán Jesús wãnnijidih yuhna, Dios ãt booanap tajĩ. Caan tígaá Dios yeejép yoobát ã peéh chãjat déedih jwiít dih ã túi wubna caá.

## 2

### *Tesalónicadih jumna, ded pah Pablo ã jumatji*

<sup>1</sup> Ñijeéh jumna, yeebdíh jwĩ bohénachah, túi wěi joinít, ñi jepahap jĩ. Páant ñi jepahachah,

---

\* **1:6** Hch 17.5-9

jwĩ tawat oboh jamni nihcatdih ñi jéihna caá.  
<sup>2</sup> “Pablowã jwiít dih enedih ã jũúwát pínah jãtih, Filipos tátchiboó ã bohénachah, ãijnit, caán tátchidih moón queétdih yeejép ã chãjap jã”, yeebboó ñi niúj náhnina nacaá. Obohjeéhtih, Filiposdih moón jwiít dih yeejép ã chãjachah yahna, úumcanjeh, Jesúih doonádih yeebdíhbut naáwádih jwĩ jwibínap jã. Biquína ñih tátchidih moón maáta jwiít dih ã naóh cádahat túutuchah yahna, Dios ã teo wáacatjãh Jesúih doonádih yeebdíh jwĩ túi naáwáp jã.\*  
<sup>3</sup> “Pablowã yoobóp dih ã naóhcan caá. Yeebdíh pánih bohéna, queétdih ñi weñat pínahdihjeh ã bidna caá”, biquína ã niúj yeena caá. <sup>4</sup> Obohjeéhtih, Dios jwĩ jenah joyát dih jéihni nin pah ã niúj naáwáp jã: “Jesúih túini doonádih ã naáwát pínah niijná, Pablowádih wã wahbipna caá”, ã niijíp jã. Pánihna, caandíh naóhna, “Pablowã túi chãjnit caá”, bita ã niúj jenah joyát pínahdih jwĩ bidcan caá. Diosboó “ã túi chãjna caá”, ã niiját pínahdihjeh bidnit, Jesúih doonádih jwĩ naáwáp jã.\* <sup>5</sup> Pánihna, yeebdíh naóhna, túini niiját pah niijcán, ñih bií déedih náahcan, ded pah jwĩ bohéátjidih ñi jéihna caá. Diosbut páant jwĩ chãjatjidih ã jéihna caá. <sup>6</sup> “Pablowã chah jéihnit caá”, yeeb, bitabut ñi niúj jenah joicát pínah niijná, yeebdíh jwĩ bohénap jã. <sup>7</sup> Jesucristoíh túini doonádih yeebdíh naáwát túutna, Dios ã wahnit jamna, yeebdíh búdí jwĩta jéih wat tagaá. Obohjeéhtih, pánih watcan, búdí oinit, chaíhjah bohéna, yeebdíh jwĩ yójahcap jã. Nomanih mi wũhdih túinijeh mi en dawát pah yeebdíh jwĩ bohénap jã. <sup>8</sup> Yeebdíh búdí oinit,

\* 2:2 Hch 16.19-24; 17.1-9      \* 2:4 Gá 1.10

wēina, nihat yeó jáap jummat pah túini doonádih jwĩ naáwáp jĩ. Bitá jwiít dih ĩ mao yohíhat dih jéihna yuhna, yeebdíh jwĩ teo wáac cádahcap jĩ. <sup>9</sup> “Jwĩjeéh ĩ jum láa, ĩh bácah ã chũnáchah yuhna, búdí ĩ tewep jĩ”, ñi niúj náhnina nacaá. “Baáb jéenat pínah jãtih teo jwíhñit, púú nihat yeó jáap teo tãah bejnit, chei tac yoob póhba ĩpĩ teo cádahap jĩ. Pánihna, Dioíh túini doonádih naóhñit, jwiít dih tac buugáihcan, ĩ jeémát pínahdih jíib chãjat túut niijná, búdí ĩ tewep jĩ”, ñi niúj jéihna caá.\*

<sup>10</sup> “Jwĩjeéh jumna, Dios ã weñat pínahdihjeh chãjnit, ĩ túi jumap jĩ”, ñi niúj jéihna caá. Diosbut caandíh ã jéihna caá. Pánihna, bita “Pablowã yeejép ĩ jumap jĩ”, ĩ jéih niijcán caá. <sup>11-12</sup> “Jwiít nihatdih túinijeh ĩ bohénachah, jwĩ túi joyóp jĩ. Biqúinadihbut jwiít dih ĩ naáwáp jĩ. Ded ã wehdih ã túi bohéat pah jwiít dih ĩ túi naáwáp jĩ. Dios ã weñat pínahdih ded pah jwĩ chãjat pínah niijná, búdí ĩ bohénap jĩ”, ñi niúj jéihna caá. Dios yeebdíh ãt ñíwip wut jĩ, ãihwã jumñit, ãjeéh ã maáh jumapboó ñi jummat pínah niijná. Páant yeebdíh jwĩ bohéatjidihbut ñi quíib buudcán nacaá.

<sup>13</sup> Pánihna, yeebdíh jwĩ naáwát dih ñi túi jepahachah náhninit, búdí wēinit, “Túina caá, Paá”, Diosdih jwĩpĩ niijná caá. ã naáwát dih yeebdíh jwĩ bohénachah, nin pah ñi niúj jenah joyóp jĩ: “ĩ jenah joyátjĩhjah naóhna ĩ chãjcan caá. Dios naáwát yoobát jwiít dih bohéna caá ĩ chãjap”, ñi niúj jenah joyóp jĩ. Pánih jenah joiná, caán naáwát dih joinít, Jesús dih jepahna, túiniboodíh túut nuumná caá ñi chãjap. <sup>14</sup> Judea baác dih moón Dioíhwã ĩ

\* **2:9** Hch 18:3; 2Ts 3.8

jumat pah yeebbát biíc yoobó ñi jumna caá. Dios ã wahni Jesucristodih queét ï jepahat jíib, ñih baácdih moón judíowã, queétdih yeejép ï chãjap jĩ. Pánihat pah muntih, yeebbát Jesúsdiñ ñi jepahat jíib, ñíih baácdih moonjéh yeebdíh yeejép ït chãjap taga.\* 15 Queét judíowã jon jãtíh Dios naáwátdih naóh yapanitjidih yehna niijnít, ït mao yohop tajĩ. Túttimah, jwĩ Maáh Jesucristodihbut ït mao yohop tajĩ. Túttimah, Dios naáwátdih ñi joicát pínah ni-ijná, jwiítboodíh ñíih tútchimant ï bacanap jĩ. Pánih chãjna, Diosdih búdí íjanit, nihat cãacwãdihbut ï eníhcan caá.\* 16 Judíowã nihcannit iiguípna ï bejat déedih náahcan, Jesúsíh doonádih naáwádih jwĩ bejehchah, judíowã jwĩ naáwátdih ï jãhíhip yah jĩ. Pánihna, Diosdih yehna ï niiját jíib, íjnit, Dios queétdih búdí ã peéh chãjbipna caá.

*Pablo Tesalónicadiñ moondíh ã jwúub eníhat*

17 Yeebdíh wã cádah jũúwúchah, wíih caolih ñijeéh ã páñap be. Maátcanjeh ñijeéh wihcan yahna, yeebdíh búdí jwĩ bidip be. 18 Pánihna, búdí oina, yeebdíh enedih jwĩ jwúub bejíhip yah be. Weemjéh dawá láa yeebdíh búdí enedih wã bejíchah yahna, Satanás jwĩ jib bejatdih ã jãhap jĩ. 19 Yeebdíh Jesúsíh doonádih jwĩ naáwáchah, ñi túi joyátjidih náhnit, búdí jwĩ wěina caá. Jwĩ Maáh Jesús ã jwúub dei jũúwúchah, ñi jepahatjidih jenah joinít, búdí wěina, “Jwĩ naóhniji túini doonádih ï túi jepahap jĩ”, Jesúsdiñ jwĩ niíj naóhbipna caá. 20 Pánihna, yeebdíh jwĩ naáwáchah, ñi jepahatji jíib,

\* 2:14 Hch 17.5      \* 2:15 Hch 9.23,29; 13.45,50; 14.2,5,19; 17.5,13; 18.12

jwĩ Maáh jwiít dih ã wẽi naáwát dih jéihnit, jwiítbut búdí jwĩ wẽina caá.

### 3

#### *Timoteodih ã wahat*

<sup>1-2</sup> Pánihna, yeebdíh búdí náhni dahwanit, yeebdíh ã enat pínah niijná, Timoteodih ñi pebhna jwĩ wah bojop be. Caán jwĩ úud panihni, weemdíh pej jumni, Cristoíh túini doonádih ãpĩ naáwáp jĩ. Diosjeh caandíh ã wahachah, weemdíh búdí ã teo wáacap jĩ. Pánihna, yeebdíh ã bohéat pínah niijná, ñi pebhna caandíh wahniji, Atenas tátchiboó biícjeh wã páñap jĩ.\* <sup>3</sup> Jesúsdih ñi jepahatji jíib bita yeebdíh yeejép ĩ chãjachah yuhna, Diosdih ñi cádahcat pínah niijná, yeebdíh wã bohéat táutap jĩ. “Jesucristodih jwĩ jepahachah, jwĩ táut nuumátdih íjnit, áihwã nihcannitboó jwiít dih yeejép ĩ chãjbipna caá”, jwĩ niíj jéihna caá. <sup>4</sup> Ñijeéh jumna, páant jwĩ yapat pínahdih dawá láa yeebdíh jwĩ naáwáp jĩ. Bũũ jwĩ naáwátji pah ã yapatdih ñi jéihna caá. <sup>5</sup> Pánihna, ded pah ñi jumatdih búdí jéihíhna, Timoteodih wã wahap jĩ. “Nemépwã ĩ maáh queétdih ã yee naáwáchah, ¿queétboó caandíh yehna ĩ niijná níit? Yehna ĩ niijcáh, nihat conboó jwĩ bohéat búdí jwĩ tewatji bũudní ã jumbipna caá”, wã niíj jenah joyóp jĩ.

<sup>6</sup> Bũũ Timoteo, ñi pebhboó juibíniji, ã jwáub juyáp jĩ. Jwáub juinít, “Nihat Tesalónica tátchidih moón meemdíh búdí ĩ túyat táutap be. Queét Dios naáwát dih tái joiná beé ĩ chãjap be. Túi joinít, Diosdih búdí oinit, ĩ míic tái oina beé. Yeebdíh náhninit,

\* **3:1-2** Hch 17.15

búdí wēinit, yeebdíh ĩ bidna beé. Yeéb queétdih bidnit, búdí enedih ñi bejíhat pah muntih, queébtut yeebdíh ĩ bidna caá”, weemdíh ā niíj naáwáp jĩ.\*  
 7 Páant ā niíj naáwáchah, yeebdíh jwĩ náhni dah-waat ā yayáh bejep jĩ. Yeéb Dios naáwát dih jepah-nit, ñi túi jumat doonádih joinít, bita jwiít dih yeejép ĩ chājachah yahna, búdí jwĩ wēina caá. 8 Yeéb jwĩ Maáh Jesúsdih ñi túi péenachah, jwĩh caolih búdí ā wēina caá. 9 Pánihna, “Paá, ma teo wáacatjĩh queét Jesúsdih ĩ túi péeatdih jéihna, búdí wā wēina caá. Páant weemdíh ma weñaat ā táina caá”, Diosdih wā niijná caá. 10 Pánih wēinit, yeó jáap, cheibut Diosdih búdí jwĩ úbhna caá, yeebdíh enat túutna, jwiít dih ā wahat pínah niijná. Yeéb Jesúhwā ded pah ñi túi chājat pínahdih beh joyát yeebdíh páantjeh ā jadhuchah, ñi pebhna jwúb bohénadih jwĩ bejíhna caá.

11 Yeebdíh jwúb enedih jwĩ bejat pínah niijná, Satanás ā jāhat panihatdih ĩ yohat pínahdih jwĩ íp Diosdih, jwĩ Maáh Jesucristodihbut búdí jwĩ úbhna caá. 12 Pánih úbhna, jwĩ Maáh yeebdíh ā teo wáacat pínahdih jwĩ úbhna caá, chah míc oinit, nihatdihbut ñi oyat pínah niijná. Pánihna, yeebdíh búdí jwĩ oyat pah muntih, yeebút biíc yoobó ñi oyat pínahdih wā náah yacna caá. 13 “Paá, queétdih ma túi teo wáacá, ma weñat pínahdihjeh ĩ chājat pínah niijná”, jwĩ niíj úbhna caá. Páant ā teo wáacachah, jwĩ Maáh Jesucristo nihat áihwájeéh jwúb dei jóhñit, Jesús jwĩ íp Diosdih nin pah ā niíj naóhbična caá: “Queét túinit ĩ jumuchah, queétdih dedé peéh chājat pínah ā wihcan caá”, ā

\* 3:6 Hch 18.5

nijbipna caá.

## 4

### *Dios ã weñat pínahdih ded pah ã chãjat*

<sup>1</sup> BHH biih bohéatdih yeebdíh jwĩ naáwát túut caá. Ñijeéh jwĩ jam láa, Dios ã weñat pínahdih ded pah ñi chãjat pínahdih jwĩ bohénap jĩ. Páant jwĩ bohéatjidih ñit quíib bHHdcáp taga. Páant ñi chãjat chah ñi túi jepahatdih yeebdíh búdí jwĩ náah yacna caá.

<sup>2</sup> Jwĩ Maáh Jesucristo ded pah ã wutatjidihjeh yeebdíh jwĩ naóh yapaatdih ñi túi jéihna caá. <sup>3</sup> Nin pah ñi jamat pínahdih Dios ã náah yacna caá: Diosdih jepahcannit ã jamat pah yeebbút ñi jamca bojoó. Ñi áa nihcannitjĩh yeejép ñi chãjca bojoó. <sup>4</sup> Dios ã enechah, cáacwãbut ã enechah, ñi túi áa jamuú. Pánih áa jamnit, mijeéh ñi túi jamuú. <sup>5</sup> Diosdih jéihcannit ã áa nihcannitjĩh ãpĩ metna caá. Obohjeéhtih, yeéb Diosdih jéihnitboó páant ñi chãjca bojoó. Ñi weha mána yaádhjeéh túinijeh ñi jamuú. <sup>6</sup> Mijeéh bóojeéh jamnihdih ñi dúuc wái metca bojoó. Dios nihat ñi chãjatdih jéihnit, páant ñi chãjat jíib búdí ã peéh chãjbipna caá. Jon ñi pebh juibínitji caandíh búdí jwĩ bohénap jĩ. <sup>7</sup> Dios jwiútdih í náah chãjatdih wutcan, túinijeh jwĩ jamat pínahdih ãt wutap wut jĩ. <sup>8</sup> Butéh wã naáwátidih weemjéh wã wutat nihcan beé. Dios yeebdíh páant ã wutatdih wã naóh yapanap be. Pánihna, ded caandíh yehna nijná, weemdíh nihcan, Diosboodíh ã yap yohna caá. Caán caá Túini Espíritudih yeebdíh wũhni.

<sup>9-10</sup> BHH míic oyatdih yeebdíh bainí wã naáwát túut caá. “Ñi míic oyoó”, Dios ã níj wutatdih joinítji caandíh túi jepahna caá ñi chãjap. Pánih jepahna,



nihat ñih baác Macedoniadih moón Jesúhwādh yeeb ñi túi oina caá. Pánih míc oinit, chah míc teo wáacnit ñi jumú. <sup>11-12</sup> Pánih míc oina, biícdih táinijeh ñi jumú. Míc jūihcanjeh, bitadih yeejép táoh naóhcan, bita ĩ tewatdih tabit ñi en naóhca bojó. Yabhcanjeh, ñi túi teweé. Pánih teonit, bitaáh bií déedih, ĩh jeémátdihbut tabit ñi úbh tac búgáca bojó. Pánih wúatdih jáantjeh yeebdíh jwĩ naáwáp jĩ. Caandíh ñi jepahachah, Diosdih jéihcannitboó yeebdíh ennit, “Queét túi chājnit caá”, ĩ niijbípna caá.

*Jesucristo ã jwúub dei jūúwáchah, ded pah ã yapat pínah*

<sup>13-14</sup> Búh, jwĩ déewã panihnitá, Jesúhwã ĩ wunuchah, ded pah ĩ yapat pínahdih yeebdíh jwĩ naáwát tút caá, tabit ñi jĩgahcat pínah niijná. Jesucristo ã wunat túttimah, Dios caandíh át jwúub boonanap tajĩ. Caan páh mantih jwiít áihwã jwĩ wunat túttimah, jwiít dihbut ã jwúub boonachah, Jesús ã jumupboó ájeéh jwĩ túi jum bipna caá. Páant jwĩ yapat pínahdih ñi túi náhninaá. Pánih náhninit, Jesúhwã, ñi oinit ĩ wunat túttimah, ñi bidna yuhna, tabit ñi jĩgahca bojó. Bita Jesús dih jepahcannit, Jesús jeéh ĩ wihcan níit. Pánihna, ĩ oinit ĩ wunat túttimah, ĩ jwúub míc encat pínahdih jéihna, búdí jĩgahnit, ĩ moh yéejna caá. Obohjeéhtih, Jesús dih jepahcannit ĩ jĩgahat pah yeeb ñi jĩgahca bojó.

<sup>15</sup> Nin pah Jesús jeh ã naáwátjidih yeebdíh jwĩ naóh yapana caá: **“Queét wíihwã wunnitji ĩ boopud jūúwát pínah jãtíh, wuncannit ĩ waóh púuh laab béj pãican níit”**, Jesús át niijíp wut jĩ. <sup>16-17</sup> Nin pah ã yap bipna caá: **“Ñi púuh laáb jūúwá”**, Jesús

ã niij ejatdih, ángelwã ï maáh bádí ã ejatdihbut jwĩ joibípna caá. Dios ã wũhni póojat nahjih ángelwã ï maáh ã póojochah, jwĩ joibípna caá. Páant ã yáanachahjeh, jwĩ Maáh Jesucristo ã jwúub dei jũóhbipna caá. Páant ã dei jũúwáchah, ãihwã wunnitji, Jesús ã boo pud jũúwátji pah muntih, ï boo pud jũóhbipna caá. Queét ï boo pud jũúwáchah, jwiit ãihwã wuncannit, ïjeéh wáac juibínit, wépép púuh laab béjnit, mah tólihna nihat biíc dih jwĩ Maáh Jesús dih jwĩ jwãáhbipna caá. Pánihna, jwiit nihat biíc dih Jesús jeéh páantjeh jwĩ jumbipna caá.\*

<sup>18</sup> Pánihat pínahdih jéihnit, yeéb bitadihbut jwúub naóh yapanaá, Jesúihwã wunnitdih tubit ï jĩgahcat pínah niijná.

## 5

<sup>1-2</sup> Bũũ, wã déewã panihnitá, Jesúihwã wunnit ded pah ï yapat pínahdih ñi jéihna caá, bũca. Obohjeéhtih, débólih Jesucristo ã jwúub dei jũóhni yeó jáap pínahdih jwiit cãacwã jwĩ jéihcan caá. “Náhnichah, nũũmní ã juyát pah jwĩ Maáh Jesucristo ã jwúub dei jũóhbipna caá”, yeebjéh ñi niij jéihna caá. Páant ñi jéihyechah, wã jwúub naóhcan niit.\*

<sup>3</sup> Diosdih jepahcannit nin pah ï niijbípna caá: “Bũũ túini láa caá. Cãacwã ï míic maocah, úumcanjeh, jwĩ túi jumna caá. Yeejép yapat jwiitdih ã wiican niit”, ï táoh niijbípna caá. Páant ï niijíchahjeh, caandih ï jepahcatji jíb, Jesús peéh chãjadih ã jwúub dei jũóhbipna caá. Yaádh ï weép jáaat dée pah ã jumbipna caá. Wudũ jumnih mi weép jáanachah, caán tubatdih mi jéih jweicán caá.

\* **4:16-17** Mt 24.30-31; Mr 13.26-27; 1Co 15.51-52  
24.43; Lc 12.39; 2P 3.10

\* **5:1-2** Mt

Pánihat pah Jesucristo ã jwúub dei júúwúchah, caandíh jepahcannitji ã yéejat jíib ã jéih jweicán niít.\* 4-5 Obohjeéhtih, wã déewã panihnítá, yeébbóó dupúnap panhipboó jumcan, baabáp panhipboó ñi jumna caá. Jesúsdih jepahcannit, bita ã encat pínah niijná, dupúnapboó yeejép ãpí chájna caá. Obohjeéhtih, yeébbóó páant ñi chájcan caá. Pánihna, náhnica h nœmní ã waád juyát pah, Jesús ã jwúub dei júúwúchah, ñi wáhi bejcan niít. Yeebdíh peéh chájadih júóhna ã chájcan niít. 6 Jwiít Jesúhwa jumna, caandíh jéihcannit ã chájat pah jwiít dih chájcat caá náahap. Ñonit panihnít jumna, ded pah nin baácboó ã yapatdih queét ã jéihcan caá. Obohjeéhtih, jáanit panihnít, “¿Dios ã weñat pínahdih chájat túut niijná, ded pah wã chájbi?” niúj jenah joyát caá jwiít dih náahap. “Waícanjeh Jesucristo ã jwúub dei júóhbi pna caá”, niúj náhninit, túi chájat caá náahap. 7 Jesúsdih jepahcannit, dupúat panhipboó jumna, ñonit panihnít caandíh ã joicán caá. “Jesús ã jwúub dei júóhcan niít”, niúj jenah joinít, ã weñat pínahdihjeh chájnit, ãpí babh máihna caá. 8 Obohjeéhtih, jwiít baabáp panhipboó jannitdih Dios naáwát dih túi jenah joyát caá náahap. ã weñat pínahdih jenah joinít, yeejép chájcat caá náahap. Soldado míc mawadih bejna, ãtah wao chá páha páahnit, áih bácahdih jáhat pínah niijná, ãtah chóodihbut áih tacamant ápí ðœoná caá. Pánihna, soldado ã míc jáhat pah, jwiít Jesúhwa dihbut míc jáhat caá náahap. Obohjeéhtih, jwíih bácahdihjeh pohba jáhatdih niijná wã chájcan caá. Jwíih caolihdih jáhatdih niijná caá wã chájap. Nin caá jwíih

---

\* 5:3 Is 13.8

caolihdih jwĩ jāhat pínah: Jesucristodih túi jenah joinít, Diosdih cãacwãdihbut túi oyat caá caolihdih jāhat ã jumap. “Jesús wã yéejatdih yohnit, weemdih ãjeéh ã ub bejbipna caá”, niij jenah joyátbut caolih jāhat ã jumna caá. Pánih jāhñit panihñit jumna, Satanás jwiít dih ã yéejat túutuchah, caandih jwĩ jéih yap yohna caá.\* 9-10 Jesucristodih jepahcannit biíc dih Dios jwiítboodih át peéh chãjñhap wut jĩ. Obohjeéhtih, ãihwã jwĩ jummat pínah niijná, jwĩ yéejat jíb, jwĩ Maáh Jesucristo jwiít dih át wun wũhap wut jĩ. Pánihna, jwiít ãihwã jumñit, nin baácboó páantjeh jumna, wanna yuhna, nihat biíc dih ãjeéh jwĩ túi jumbipna caá. 11 Caandih náhninit, Jesús dih ñi túi jenah joyát pínah, ñi jepahat pínahdihbut páantjeh ñi míc teo wáacá.

*Pablo queédih biñ ã wutat*

12-13 Bũũ yeebdih bainí wã jwũub naáwát túut caá, páant muntih. Ñijeéh jumñit Dios naáwát dih yeebdih ã bohénachah, ñi túi joyoó. Yeebdih bohéat pínah niijná, Diosboó queédih ã wutuchah, yeebdih bohénit, bádí ã teona caá. Pánihna, queédih oinit, ñi túi jepahaá. Yeebát míc oinit, biíc dih ñi túi jumũú.

14 Yabhñitdih ñi tewat túutú. Ŝumñitdih, jñgahñitdihbut ñi weñanaá. Wẽpcannitdih ñi túi teo wáacá. Bitadih yójahcan, ãjeéh ñi túi jumũú.

15 Yeebdih yeejép chãjñitdih ñi yéj chãj jwũubaca bojoó. Nihatdih túi chãjñit, biíc dih ñi túi jumũú.

16 Ded pah yeejép yapna yuhna, Diosdih túi jenah joinít, páantjeh ñi weñeé.\* 17 Caandih ñi wũbh

\* 5:8 Is 59.17; Ro 13.12; Ef 6.13-17 \* 5:16 Fil 4.4

cádahca bojoó. <sup>18</sup> Yeó jáap jummat pah “Táina caá, Paá”, Diosdih niijnít ñi jumúú. Túi yapna, yeejép yapna yuhna, biíc yoobó “Táina caá, Paá”, niijnít ñi jumúú. Pánihatdih Dios yeéb Jesúíhwādih ã náah yacna caá.\*

<sup>19</sup> Túini Espíritudih túi jepahnit, ded pah ã teo wáacatdih ñi jáhca bojoó. <sup>20</sup> Detdih Túini Espiritu ã naáwáchah, queét ì naóh yapaíhichah, yeéboó joííhcannit pah ñi jumca bojoó. <sup>21</sup> Pánihna, nihat naáwátidih túi jenah joinít, ded túini, ded táicanni ã jummatdih ñi jéihyeé. Pánih jéihna, táinidih jepahnit, ñi náhninaá. <sup>22</sup> Obohjeéhtih, táicanniboodíh, ñi joyáh bojoó.

<sup>23</sup> Jwiít yeebdíh Dios ã túyatdih búdí jwĩ náah yacna caá. Pánihna, yeebdíh úúbhna, “Paá, queét mííhwādih búdí ma teo wáacá, yéej chājatdih ì yap yohat pínah niijná. Meemdíh ì túi jenah joyát pínahdihbut teo wáacnit, queétdih ma túi wapaá”, búdí jwĩ niij úúbhna caá. Páant ã teo wáacachah, jwĩ Maáh Jesucristo ã jwúub dei jūóhni yeó jáapdih yeéb áihwā túinit ñi jumbipna caá. <sup>24</sup> Diosjeh yeebdíh ñíonit, ã niijátji pah yeebdíh ã túut nuúm péabipna caá.

*Pablo ã péé túyat túutat*

<sup>25</sup> Wā déewā panihnitá, jwiítdihbut búdí ñi úúbú.

<sup>26</sup> Dios ã oyatjñh nihat Jesúíhwā ñi túi míc úúbú.

<sup>27</sup> Jwĩ Maáh Jesús ã enechah, nin pah yeebdíh wā naóhna caá: Nin núodih ñi pebhna ì ub juibínachah, nihat caánboó jumnit Jesúíhwādih ñi túi en naáwá.

<sup>28</sup> Jwĩ Maáh Jesucristo yeebdíh oinit, ã túi teo wáaca naáh.

---

\* **5:18** Fil 4.6; Col 4.2-7

Páant bóojeh tigaá wã naáwát.  
Pablo

## **Dios ã jáap naáwát tólih New Testament in Cacua**

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

### **Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Cacua

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
34c9543b-57a6-5290-ab7b-4fa15529a7e2